

REGIONAL NEWS BULLETIN

HEADLINES (MORNING)

1. Agriculture Minister Pu PC Vanlalruata'n thla thar February ni 20 atangin sorkarin sawhthing a lei tan dawn a ti.
2. Kum 2024 chhungin Serchhip district-ah TB vei 69 hmuhchhuah a ni a, December thla thleng khan an zinga 37 enkawl dam an ni tawh.
3. February ni 5 ah Delhi Assembly inthlan neih a ni dawn.
4. Nepal leh Tibet ramri-a lirngching avanga thi zat chu 126 an tling tawh.



AGRI MINISTER

Agriculture Minister Pu PC Vanlalruata'n thla thar February ni 20 atangin sorkarin sawhthing a lei tan dawn tih a sawi.

Niminaa pisaa chanchinbumite a kawmnaah Minister chuan sorkarin Agricultural Market Assurance Schemes hnuai a sorkarin rate tur a tihchhuah tawh angin sawhthing chu kg-ah cheng 50 a lei a ni dawn a ti a. Mizoram puma khaw hrang hrangah society 675 a awm tawh thu sawiin heng society te hian district hrang hranga sorkarin a ruahman sawhthing lakhawma leina tur, secondary collection centre 54-ah an phurhkhawm dawn thu sawiin District tina District Agriculture Marketing Committee in an lo buaipui dawn a ti bawk.

Minister chuan sawhthing chu India ram hmun hrang hrangah an thar nasat thu sawiin a bik takin India ram chhim lamah an thar nasat thu a sawi a. Tun dinhmunah India ram puma sawhthing rate a la san loh thu sawiin kg-ah cheng 20 atanga 25 vel a ni a ti a. Sawhthing lei tur, buyer hrang hrang ten Mizoram lam la hawi hman loin India ram hmun dangah sawhthing an la lei mek thu sawiin India ram hmun thenkhatah cho mek an la awm a ti a, rate mumal tak siam ala nilo tih a sawi.

Mizoram Agriculture Marketing Board Chairman ni bawk Pu PC Vanlalruata chuan Sorkarin kuthnathawktute chu sawhthing an lei tan hun tura ruahman, thla thar ni 20 chu nghak hram turin an ngen a ti a, thlai dangah pawh hmalak mek a nih thu sawiin Buhhum thar a tam theih nan hma an la a ti a, kumhloi December ni 17 atangin Pangbalkawnah buhhum kg-ah cheng 30 a lei tan a nih thu sawiin Hmarcha kg-ah cheng 350 aia to in hralh mek a ni a ti a. Hmunphiah hralhna tur pawh tihfel a nih thu sawiin panel buyer mi 7 thlan an nih thu leh inremna siamin a chingtuten an hmunphiah an keh tan thu leh March atangin a leitute hnenah hralh tan a nih dawn thu a sawi bawk.



AIZAWL DC

Aizawl Bawrsap Pu Lalhriatpuia, District Magistrate chuan thupek chhuahin phalna nei loa petrol leh diesel zawrh a khap.

District Magistrate thuchhuahin a tarlan danin thupek hi Section 5 & 6 of the Mizoram Motor Spirit and High Speed Diesel (Prevention of Malpractices in Supply and Distribution) Order, 1992 kalh tlat a nih avanga chhuah a nih thu tarlan a ni a. Dan ang taka petrol leh diesel hralh a lo nih theihnan leh mipuite an lo him tlan zawk nana thupek chhuah a nih thu tarlan a ni bawk a ni.

He khapna thupek zawm lo te chu an petrol man sak an nih bakah BNS Section 223 hmangin an chungah hremna lek a ni dawn a. He thupek hian chhuah a nih atangin thla hnih chung a huam dawn a ni.

<><><>

CHAMPHAI-HANDHOLDING

Sawrkar Flagship Programme - 'Handholding Policy' hnuaiia Thlai thar chhuah lakkhawmna leh hralh chhuahna tur chungchang ngaihtuahin Chairman Pu VL Remliana Champhai District Bawrsap hovin District Agriculture Marketing Committee an thukhawm a.

Pu VL Remliana chuan Ban a Kaih Policy kuthnathawktute tana sawrkarin a duan hi hlawk taka mipui ten an hman theuh a beisei thu sawiin Champhai District chuan thlai thar chhuah an ngah dawn avangin he Handholding Policy ti hlawhtling tur leh kuthnathawktu ten hma an sawn theih nan leh man man zawka an thlai tharte an hralh theih nan line department te an pawimawh hle a, theihtawp an chhuah a tul a ni a ti. Bawrsap chuan mipui ten an thlaithar chhuah awlsam zawk a an chhun luh theihna tur leh an hralh chhuah theihna tur - Collection Centre uluk taka thlan a tul thu a sawi bawk.

District Agriculture Marketing Committee chuan Thlaithar lakkhawmna (Collection Centre) hi hmun 15 Tualcheng, Hnahlan DCSO Godown, DCSO Godown New Champhai, Melbuk, Mualkawi, Sazep, Khuangleng, Khawbung, Leithum, Vanzau, Farkawn, Vaphai, N. Khawbung, LAMPS Godown Ramhrangkawn, New Champhai Cold Storage te a ruahman a. January thla chung hian Collection Centre Building te hi tih chian tur niin, thlai thar chhuah te Collecton Centre a dah luh leh hralh chhuah te awmze nei zawka kalpui anih theihna turin Collection Centre Supervisor nei tura hmalak ni se tiin a rel bawk a ni.

<><><>

SERCHHIP

Kum 2024 chhungin Serchhip district-ah TB vei 69 hmuhchhuah a ni a, nikum kumtawp, December thla thleng khan heng zinga 37 hi enkawl dam an ni tawh.

Nimina Serchhip District TB Forum, an Chairman Pu Paul L. Khuma, Serchhip Bawrsap hoa Serchhip DC Meeting Hall-a thukhawm chuan he thu hi an tarlang a. Bawrsap chuan TB natna in mihring taksa-ah a tha lo zawnga nghawng chi hrang hrang a neih theih avangin ngaih pawimawh a tul hle a ni a ti a. Miin a lo vei palh a nih pawhin tha taka damdawi ei chu a enkawlina awmchhun a ni a ti a, TB vei ten TB damdawi ei an ngaih pawimawh a tul thu a sawi a ni. He natna vei te enkawlina kawnga thawktute inpekna pawh fakawm a tih thu sawiin, theihtawp chhuah zel turin a chah bawk a ni.

He thutkhawmah hian '100 Days TB Campaign' kalpui chungchang tarlan niin, he hmalakna hi Mizoram-a District 4-ah kalpui mek a nih thu leh kumin-a World TB Day, March 24 thlengin kalpui a nih dawn thu tarlan a ni a. Mi tlawmngai te tanpuina atanga TB vei damlo ten chawtha an dawn theihna tur, 'Nikshay Mitra' hnuaiia Serchhip District chhungah mi pahnih in tanpuina an dawn mek thu tarlan a ni bawk. 'TB Free Village' kalpui mekah kum 2023-ah Serchhip District-a khua 11 leh kum 2024-ah khua 35 te TB Free Village-ah puan an nih tawh thu tarlan a ni a, kumin a World TB Day-ah khua zawng zawngte TB Free Village a puan hman beisei a nih thu pawh he hunah hian tarlan a ni.



HMPV

Tunhnaia hri leng mek, Human Metapneumovirus (HMPV) laka inven dan Health Minister chairman-na hnuaiyah a viltu tur 'Core Committee on HMPV' din a ni.

He hri leng chungchangah hian Health Minister Pi Lalrinpuii hovin Core Committee on HMPV thutkhawm niin State level leh District tinah Rapid Response Team siam a ni a. Henga thawktute leh mipuite hriat tur pawh rel niin tun tum China a hriheng HMPV chu tlang hriheng chi khat, kum danga leng thin ang tho a ni an ti a. Tunah hian Karnataka state-ah naute thla thum mi leh thla riat mi ah hmuhchhuah niin an dinhmun ngaihtuahawm a ni lo a, dam lam pan zelin pakhat chu damdawiin atanga chhuah tawh a ni tih tarlan a ni.

Thutkhawma tarlan danin he natna hrik hi China chauh ni lo, khawvel pumah kum tin a leng a, kumtluan a leng a ni a, hritlang satliah angin a langchhuak thin a. Health Department chuan IDSP kaltlangin he natna hi uluk takin a vil reng tih sawiin tun hnaiah Influenza like illness leh Severe Acute Respiratory Illness case tam thar thut report a awm lo tih an tarlang a ni.



SERCHHIP

Serchhip ah Digital Agricultural Mission-Aerial Survey of Agricultural Land chungchang ngaihtuahin DC Meeting Hall ah Bawrsap Pu Paul. L. Khuma kaihhruaiin nimin khan thutkhawm a ni.

Bawrsap chuan Agriculture and Farmers' Welfare Department atanga thu an hmuh anga chawpchilh taka meeting koh a nih thu a sawi a. Serchhip District-a loneitute hmasawna atan pawimawh tak Aerial survey neih a, an hmuhhma te eng ang nge a nih a, eng thlaite nge chin theih tihte ngun taka zirna tur chungchang ngaihtuah an nih thu a sawi a ni.

He hna thawktu tur M/s Theta Enerlytics Pvt. Ltd., New Delhi Chairman Colonel Anil Kumar Mehta (Rtd) chuan Digital Agricultural Mission kaltlang hian Mizorama loneitute nasa zawka hma an sawn theih a beiseiawm thu a sawi a. Hmalakna hmasa ber atan Serchhip District chu thlan a ni, a ti a. He hmalakna hnuaiyah hian loneitute dinhmun chiang taka zirin, an ram awm dan azira an hmalak dan turte enpui tur an nih thu a sawi a. Department hrang hrang- Sericulture, Horticulture, AH & Vety leh Soil and Water Conservation Department hnuaiyah loneitute hmuhhma chu Drone hmanga en a nih tur thu a sawi a ni.

Survey inbuatsaih nan hian vawiin hian heng Department a thawktute tan hian DC Pisapui hall-ah training buatsaih a ni ang.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.



DELHI ELECTION

February ni 5 ah Delhi Assembly inthlan neih a ni dawn. Nimin khan Election Commission chuan Assembly seat 70 awmna Delhi Assembly inthlan hun tur hi a puang a. Vote tla te hi February ni 8 ah chhiar a ni ang. Chief Election Commissioner Rajiv Kumar-a chuan Delhi inthlan hriattirna hi tun thla January ni 11 ah tihchhuah a ni dawn a ti a. Inthlan chuh tumte tan tun thla ni 17 thleng hming thehluh theih a ni a. Polling station sing khat sang 3 leh 33 siam a ni dawn a. Tun tum inthlanah hian voter nuai 155 chuang an awm a ni.

Chief Election Commissioner chuan inthlanah hian Delhi mipuite vote thlak theuh turin a sawm a. EVM khawl tihdanglama puhna chu hnawlin EVM khawlte a him tawk tih a sawi a. India rama inthlan dan chu khawvel huap pawha a tha ber pawl a ni a ti.

Tuna Delhi sawrkar kal lai mek hi thlaleh ni 23 ah a tawp dawn a. Kum 2020 inthlanah khan AAP te chuan seat 62 la in BJP ten seat 8 an la a ni.



BHARATPOL

Union Home Minister Amit Shah chuan nimin khan Central Bureau of Investigation (CBI) te tana portal siam BHARATPOL New Delhi-ah a hawng. BHARATPOL portal hmang hian INTERPOL kaltlanga ramdang atanga puihna rawn dilte awlsam taka lo chhinchiahin Red Notice leh INTERPOL colour-code dangte awlsam taka pekchhuah a ni tawh dawn a ni.

Thusawiin Union Home Minister Amit Shah chuan BharatPol chuan khawvel puma hnuchhuina kawngah bungthar a kai tir dawn a ti a. Interpol te nen awlsam takin an inzawm tawh ang a, hnuchhui kawngah pawh hma an sawn phah ngei dawn a ni a ti bawk.



NE E-ROLL

Hmarchhak state pali Manipur, Mizoram, Meghalaya leh Arunachal Pradesh-ah te mipa aiin hmeichhe vote nei an tam. Heng state paliah te hian mipa leh hmeichhe awm zat gender ratio pawh rampum chawhrual aiin a sang zawk a. Election Commission-in Special Summary Revision 2025 tihchhuah thar berah heng hmarchhak state paliah te hian hmeichhia an tam zawk vek tih sawrkar thuneitute chuan an sawi a ni.



NEPAL EARTHQUAKE

Nepal leh Tibet ramri-a lirnghing avanga thi zat chu 126 an tling tawh a. Chinese media Xinhua tarlan danin mi 188 in hliam an tuar a ni. Puan tawh angina nimin tuk khan Nepal-Tibet ramriah hian magnitude 7.1 a nain lir a nging a. Lirnghing intanna Epicentre hi Tibet ramchhung Xizang hmunah a ni a. He lirnghing hi India hmar lamah pawh hriat ve a ni a. Bihar, West Bengal leh Sikkim-ah te lirnghing hi an hre pha a ni. Bihar hmun thenkhatah chuan lirnghing hi a na ve hle a, mipuiten an in an tlanchhuahsan hial a ni.

